



Commemorà il 1250avel anniversari
Avant 1250 onns è Sagogn vegni menziunà per l'emprima gida en il testament da Tello.

9



Jean-Jacques Rousseau e la Svizra
Las relaziuns da l'illuminist tar sia citad natala e tar ulteriuras parts da la Svizra dad oz.

12

südostschweiz

LA QUOTIDIANA

Redacziun: Via Sommerau 32, 7007 Cuirra, tel. 081 255 57 10, redacziun@laquotidiana.ch

Mustér: Sut Gliendas SA realisescha residenza per seniors

■ (anr/hh) Quels dis ei la domanda da baghegiar per la residenza per seniors a Sut Gliendas a Mustér vegnida inoltrada alla vischnaunca. Quei ei succediu paucs dis suenter che la Sut Gliendas SA ei vegnida fundada. Ella realisescha sin ina parcella el-la vischinonza dalla baselgia parochiala e da Puntreis ina surbaggiada cun treis casas a mintgamai siat entochen otg habitaziuns adattadas per seniors e persunas

impedidas. Contonschiblas ein quellas tuttas cun ascensurs naven dalla garascha sutterrana. La finamira dils investurs ei d'entscheiver cun las lavurs da baghegiar la stad vegnenta. Biebein in onn pli tard san las empremas habitaziuns vegnir retratgas. Las habitaziuns ein da differenta grondiezia. Aschia san ellas era vegnir affittadas da famiglias.

> PAGINA 5

360 paginas fantasia

Duas buobas han scret in roman fabulus

■ (anr/gv) Flurina Albin e Stina Hendry ein stadas la mesjamna vargada il hosp da sorpresa alla Conferenza generala Surselva. Las duas scolaras dil gimnasi han legiu ord il roman «Emalio». Quei roman fabulus captivont han ellas scret el-la vegliadetgna da tredisch onns e seschau inspirar da romans e da films da fantasia. Il stausch per scriver in cudisch sco ei ha aunc mai dau en tala fuorma en romontsch han las duas auturas survegniu el rom d'in project da scriver inziaus ella scola superiu-

ra Lumnezia. Beinspert han las persunas dil fatg encurschiu il talent dallas duas scolaras lumnezianas carschidas si biling. «All'entschatta eran ils centaurs. Umens e dunnas cun corps da cavals. Firms sco negin'otra creatira.» Las marveglias da leger tgei che duas buobas lumnezianas han scret sebrattan beinspert cullas marveglias per ina ovra captivonta. «Emalio» ei in roman per affons e giuvenils che tschaffa era carschi.

> PAGINA 11



Il roman «Emalio» ei in cudisch cun 360 paginas fantasia.

FOTO G. VENZIN

La CGL sün peis solids

■ (anr/fa) A la Conferenza Generala Ladina (CGL) fan part tuot la magistraglia da l'Engiadina Bassa e Val Müstair. Da seis s-chars 190 commembers d'eiran preschaints d'incuort a Zernezbundant 150 persunas. Dürant il mais november as chatta la magistraglia ladina per seis inscunter annual. La CGL exista fingià daspö 79 onns e dà a las commembras e commembers l'ocasiun da s'in-

scuntrar e discuter problems actuals da las singulas scoulas rumantschas. A chaschun da la radunanza da marcurdi ha comunicà la chaschiera Claudia Cantieni Käser cha la facultà s'haja augmentada l'on passà per 3500 francs. Üna part da lur facultà investischa la CGL in novs mezs d'instrucziun i'ls idioms puter e vallader.

> PAGINA 13

Udir e leger rg sin stgalim superiur

La regenza metta en vigor il sector rumantsch dal Plan d'instrucziun 21

DA MARTIN CABALZAR

■ Al Plan d'instrucziun 21 sa participeschan tut ils chantuns germanofons e pluriling da la Svizra. Damai ch'il Grischun è il sulet chantun triling ha el stui elavurar betg main che otg plans d'instrucziun supplementars per l'instrucziun da linguas. Reglè è uss definitivamain l'instrucziun d'idioms e rumantsch grischun. Il plan d'instrucziun per il sector spezial da rumantsch sco lingua da scola vegn mess en vigor il medem mument sco l'entir Plan d'instrucziun 21 en il Grischun, probablamain per l'onn da scola 2018/2019. En sia ultima sesida ha la regenza deliberà il plan d'instrucziun per il sector spezial da rumantsch sco lingua da scola che permetta d'elavurar in med d'instrucziun da lingua en ils idioms sin ina basa lianta. Gia l'avrigl 2015 ha la regenza approvà l'elavuraziun d'in med d'instrucziun da lingua per la segunda fin novavla classa en ils idioms. Il Plan d'instrucziun 21 sa tegn vi dal princip che la vischnanca decida tge lingua d'alfabetisaziun che



En il rom dal Plan d'instrucziun 21 ha la regenza reglè l'instrucziun dals idioms e dal rumantsch grischun en las scolas.

FOTO V. BÜRKL

duai vegnir instruida. Tenor conclus da la regenza na datti en scola cun instrucziun idiomatica naginas pretensiuns elementaras per

il rumantsch grischun. Sin il stgalim secundar 1 survegnan er las scolaras ed il scolars da questas scolas l'ocasiun dad udir e da le-

ger texts en rumantsch grischun ed en ulteriurs idioms.

> PAGINA 3

Val Müstair: Aboli il circul electoral

■ (anr/afi) Ils 96 preschaints da la radunanza cumünala da Val Müstair han fat bun trais preventivs per l'on 2016: Quel cumünal, quel dal Provedimaint Electric Müstair e quel dal Center da sandà Val Müstair. Plünavant han las votantas ed ils votants fat bun ün credit per üna nouva halla da s-chalizzas ed ün credit pel nov inchaschamaint da l'aua da Vau. Quist edificzi d'eira gnü devastà d'ürant las stasoras da la stà passada. La radunanza cumünala ha implü aboli il circul electoral per l'elecziun da la suprastanza cumünala.

> PAGINA 13

Industria svizra patescha

■ (rtr) Il sector d'industria ha pers marcantamain il terz quartal 2015. Uschia è la produczion sa sminuida per passa 3%, communitgescha l'Uffizi federal da statistica. Er il segment da construcziun ha patì. Cunzunt en il segment da construcziun auta è vegni costruì passa 7% damain che avant in onn. Las svieutas en il sector secundar d'industria èn medemamain sa reducidas il terz quartal e quai per passa 6%.

Ushè bella è nossa cuntrada

DA GION NUTEGN STGIER / ANR

■ Nostalgia populara, maletgs sco sch'els fissan ina carta postala, lieus singulars e cun Anuk Steffen e Quirin Agrippi dus uffants che persvadan cun lur carisma particular. Quai ils attributs per la nova ediziun dal film «Heidi» che vegn proximamain en ils kinos svizzers. Ier èn ils meds da

massa stads envidads a Cuirra en il «Kinocenter» al nov film da «Heidi», in film tenor il roman da Johanna Spyri, ina istorgia ch'è ordvart la Svizra bunamain anc pli populara. Per la reschia da quel nov classicher segna Alain Gsponer, ina persuna da renum internaziunal. Ina gronda part dal film da bunamain duas uras è vegnida filmada en il Grischun, cunzunt a Latsch

en Val Alvra ed a Sufers en la Val-ragn. Al reschissur èsi reüssi cun ses motifs da bellezza da dar al film ina expressiun fitg ferma, in caracter agen, da dar a la cuntrada anc dapli vita e grazia a las acturas ed als acturs professionals il dreg vestgè ed il bul per in film che daventa segir in vair «bestseller».

> PAGINA 2



Anuk Steffen e Quirin Agrippi persvadan en lur rollas sco Heidi e Peter.

MAD



50048

9 771424 749004

Servetsch d'abunents e da distribuziun: tel. 0844 226 226 mail: abo@somedia.ch